

Headlines

- 1 गृह मंत्री अमित शाह होंरें आखेआ ऐ जे जम्मू-कश्मीर च आतंकवाद फैलाने च मुलव्वज कुसा गी बी बखशेया नेई जाग ते सुरक्षा ते अलगाववाद उप्पर कोई समझौता नेई होगा।
- 2 उपराज्यपाल मनोज सिन्हा होंरें राष्ट्र विरोधी गतिविधियें च मुलव्वज दऊं सरकारी मलाजमें गी नौकरी शा बर्खास्त करी दित्ता ऐ।
- 3 जम्मू-कश्मीर दे उधमपुर-किश्तवाड च आतंकियें दी धरपकड लेई तपाशी अभियान परतियै चलाया जा'रदा ऐ।
- 4 अज्ज पूरे मुल्ल च महावीर जयंती धार्मिक श्रद्धा कन्नै मनाई जा करदी ऐ। उपराज्यपाल होंरें शिक्षा संस्थानें गी आग्रह कीता जे ओह अहिंसा ते करुणा दे मूल्यें गी विद्यार्थियें दी शिक्षा च शामिल करन।
- 5 मुख सचिव होंरें रियासी च 2 आधुनिक पुलें दे निर्माण दे चलदे इलाके दिएं प्रमुख सैलानी थाहेंरें गी बढावा देने उप्पर जोर पाया ऐ।

<><><><><><>

Shah-Terrorism

गृह मंत्री अमित शाह होंरें आखेआ ऐ जे उन्दे हालिया जम्मू-कश्मीर दौरे दौरान मुखमंत्री उमर अब्दुल्ला हुंदे कन्नै उंदी मलाटी बडे गै साजगार माहौल च होई जिस दौरान मुख तौरा पर गल्लबात विकास ते सुशासन दे बारे च कीती गेई। उनें आखेआ जे असें सदा गै सब्बनें क्षेत्रीय हकूमतें गी विजन कुसै फरकोफकी दे इक बरोबर दी अहमियत दिती ऐ। इक प्राइवेट टी.वी चैनल कन्नै गल्लबात दौरान गृह मंत्री होंरें आखेआ जे केंद्र सरकार जम्मू-कश्मीर च नमी चनोई दी सरकार कन्नै मिलियै चलने लेई बचनबद्ध ऐ। उनें आखेआ कि राष्ट्र दी सुरक्षा सरकार लेई सब्बनें शा उप्पर ऐ ते पैहली तरजीह ऐ जेडा कोई बी जम्मू-कश्मीर च आतंकवाद फैलाने च मुलव्वज ऐ, भाएं ओह कोई आतंकी संगठन होऐ जां आतंकवादिएं दा हिमायती, उसी बखशेया नेई जाग।

<><><><><><>

LG-Employees

उपराज्यपाल मनोज सिन्हा होंरें राष्ट्र विरोधी गतिविधिएं च मुलव्वज दऊं मलाजमें गी बर्खास्त करी दित्ता ऐ जिंदे च पुलस मैहकमे च असिस्टेंट वायरलेस आपरेटर बशारत अहमद मीर ते पीडब्ल्यूडी मैहकमे च सीनियर असिस्टेंट इश्तियाक अहमद शामिल ना जानकारी मूजब एह दवै राष्ट्र विरोधी तत्वे ते पाकिस्तान लेई जसूसी करने आलें दे संपर्क च हे।

<><><><><><>

Defence

रक्षा मंत्री राजनाथ सिंह होंरें आखेआ ऐ जे ग्रे-जोन दे दौर च नमें किस्मा दी लडाई साइबर हमले ते दुष्प्रचार अभियान राजनीतिक सैन्य उद्देश्यें गी हासल करने दे उपकरण ना Wellington च Defence Service Staff College (DSSC) दे दीक्षांत समारोह गी संबोधित करदे होई रक्षा मंत्री होंरें आखेआ जे एल्लै चला'रदे विवाद ते समकालीन रुझाने इस गल्ला गी उजागर करी दित्ता ऐ जे नमें किस्मा दी लडाई गी नमें सिरेआ लिखेआ जा'रदा ऐ ते भारत ते पूरा विश्व इस बेल्लै सुरक्षा चुनौतियें दा सामना करा'रदा ऐ।

<><><><><><>

Twin-Encounter

जम्मू-कश्मीर दे उधमपुर ते किश्तवाड जिलें च किश तुपाई अभियानें दौरान छिडे दे टाकरे च कल न्हेरा पौने दे बाद गोलीबारी बंद होई गेई, पर सुरक्षाबलें रात भर घेरा पाई रक्खेआ ते अज्ज बडुलै परतिए इलाके गी खंगालना शुरू करी दित्ता। उधमपुर दे जोफर

मारता ते किशतवाड दे छातरू इलाके च सुरक्षाबलें दी आतंकवादिं कन्नै झत्त होई ही। उधमपुर दे एसएसपी अमोद अशोक नागपुरे होरें दस्सेआ जे दऊं तरफा गोलीबारी कोई 2 घंटें तोडी चली ही ते न्हेरा पौने पर अभियान रोकी दित्ता गेआ हा। 24 मार्च गी कठुआ जिले दे सान्याल इलाके च शुरू होई दी तुपाई कार्रवाई अजें बी जारी ऐ जिस दौरान 27 मार्च गी छिडे दे टाकरे च 4 पुलसकर्मी शहीद होई गे हे ते 2 आतंकवादिं गी मारी मकाया गेआ हा।

<><><><><><>

Flag Meeting Poonch

तोआई, पुंछ जिले च नियंत्रण रेखा पर किश रोज पैहले संघर्ष विराम दी खलाफवर्जी दिं घटनां दे बाद अज्ज चक्का दा बाग थाहर पाकिस्तानी फौज कन्नै कमांडर सतह दी फ्लैग मीटिंग लगगी। कोई इक घंटे तोडी चली दी इस मीटिंग दा मकसद बन्ने पारा बार-बार संघर्ष विराम दी खलाफवर्जी करी पैदा तनोतनी गी घट्ट करना हा। इस बरे फरवरी म्हीने दे बाद इस चाल्ली दी एह दुई फ्लैग मीटिंग ऐ।

<><><><><><>

Centre-Poshan

केंद्र नै प्रधानमंत्री पोषण शक्ति निर्माण स्कीम तैहत इस्तेमाल होने आहली सामग्री दे खर्चें च 9 इशारिया 50 फीसद दा बाद्दा दर्ज कीता ऐ। एह स्कीम इक्क केंद्र प्रायोजित स्कीम ऐ, जेदे तैहत सब्बनें सरकारी ते सरकार दी माली मदाद कन्नै चलने आहले स्कूलें दी बाल बाटिका ते पैहली शा 8 जमात च पढने आहले 11 करोड़ शा बद्द विद्यार्थियें गी ताजा पक्की दी रूट्टी खलाई जंदी ऐ। केंद्री शिक्षा मंत्रालय नै गलाया ऐ जे अगले म्हीने दी 1 तरीक थमां सब्बनें राज्यें ते केंद्र शासित प्रदेशें च एह नमें रेट लागू करी दित्ते जांगन। इस बाद्दे करी केंद्र सरकार उप्पर 954 करोड़ रपे दा बाद्दा खर्च आई गेआ ऐ। एहदे अलावा केंद्र सरकार भारतीय खाद्य निगम दे जरिये 26 लक्ख मीट्रिक टन अनाज बी मुहैया कराग।

<><><><><><>

Mahavir

अज्ज पूरे देश च 24में ते अखीरी जैन तीर्थअंकर भगवान महावीर जयंती धार्मिक श्रद्धा ते हर्षोल्लास कन्नै मनाई जा करदी ऐ। एह जैन समुदाय दे सब्बनें शा पवित्र दिनें चा इक ऐ। भगवान महावीर हुंदे अनुयायी अज्ज दे दिन प्राथनाएं दा मंत्रोच्चारण ते प्रसाद वितरण करदे न।

<><><><><><>

LG-Mahavir

उपराज्यपाल मनोज सिन्हा होरें शिक्षा संस्थानें गी जोर देइयै आखेआ ऐ जे ओह अहिंसा ते करूणा दे जैन मूल्यें गी विद्यार्थियें दी शिक्षा च शामिल करन जेदे कन्नै निस्वार्थ सेवा दी भावना च बाद्दा होऐ। जम्मू च अज्ज महावीर जयंती दे उपलक्ष्य च एस.एस जैन सभा आसेआ आयोजित इक कार्यक्रम च बोलदे होई उपराज्यपाल होर सब्बनें लोकें गी महावीर जयंती दी मुबारकबाद दित्ती ते गलाया जे भगवान महावीर हुंदे आसेआ दित्ती दी शिक्षा सब्बनें लेई उन्दे अर्शीवाद ते उंदी सोच नै सर्वस दा भल कीता।

<><><><><><>

CS Rail Bridge

मुख्व सचिव अटल डुल्लू होरें अज्ज जम्मू प्रांत दे 2 महत्वपूर्ण रेल पुलें दा दौरा लाया जिंदे च रियासी जिले च बनाया गेदा आधुनिक इंजीनियरिंग दी शानदार मसाल चिनाह दरेआ पर बनाए गेदा दुनिया दा सब्बनें शा उच्चा रेल पुल ते अंजी खड्डु रेल पुल शामिल न। उनें आखेआ जे इनें 2 पुलें दे निर्माण कन्नै इलाके च सैलानिएं दी आमद च बडा मता बाद्दा होग, उनें इनें इलाके दिं सैलानी थाहरें गी तुरत प्रभाव कन्नै बढावा देने पर जोर दित्ता।

<><><><><><>

SC-Waqf

सुप्रीम कोर्ट दे प्रधान न्यायधीश संजीव खन्ना हुंदी अध्यक्षता च सुप्रीम कोर्ट दे त्रै जजें दी पीठ वक्फ संशोधन कनून 2025 दी संवैधानिक वैद्यता गी चुनौती देने आहलिएं याचिकाएं पर 16 अप्रैल गी सुनवाई करोग। इस बारै जारी जानकारी मूजब जस्टिस

संजय कुमार ते जस्टिस के.वी विश्वनाथन होर बी इस पीठ च शामिल होंगन। तोआई, केंद्र सरकार नै अतरूं मंगलवारें सुप्रीम कोर्ट च इक कैविएट दायर करियै मामले पर कोई बी हुकम जारी करने कोला पैहले सुनवाई करने दी गुजारश कीती ऐ। कैविएट कुसै धड़े आसेआ हाई कोर्ट या सुप्रीम कोर्ट च एह पक्का करने लेई कीती जंदी ऐ जे सुनवाई दे बिजन कोई हुकम पास नेई कीता जा। हाल च बने दे इस कनून दी संवैधानिक वैद्यता गी चनौती दिंदे होई कई याचिकां सुप्रीम कोअर् च दाखल कीतियां गेदियां न।

<><><><><><>

Police Nukkad

डोडा पुलस नै लोकें गी नशे दी कबैतू बारै जानकार बनाने लेई नशामुक्त भारत अभियान तैहत डोडा दे पराने बस अड्डे उप्पर इक्क नुक्कड़ नाटक दा आयोजन कीता। इस मौके उप्पर एसएसपी डोडा संदीप मेहता होर मुख्व परौहने हे। इस दौरान साहडे जिला संवाददाता कन्नै गल्ल करदे होई उनें आखेआ।

<><><><><><>

Weather

मौसम विभाग नै अगले 24 घैंटें दौरान जम्मू-कश्मीर च हल्की बरखा ते अंधी झक्खड़ चलने दा अनुमान जताया ऐ। एहदे मगरा 12 अप्रैल थमां मौसम साफ होई जाग। मौसम विभाग नै दस्सेआ ऐ जे कल सब्बनें शा मती बरखा गुलमर्ग दे स्की रिजार्ट च दर्ज कीती गई ऐ। जंदी रातीं कश्मीर दे मते सारे हिस्सें च बरखा पौने दी खबर ऐ।

<><><><><><>

Mughal-Road

पुंछ दे डिप्टी कमिश्नर विकास कुंडल ते एस.एस.पी शफाकत हुसैन होरें बक्ख-बक्ख इलाकें च बर्फ ढाहने दे कम्म दा जायजा लैता। इस दौरान उनें मुगल शिडक सने होर दुइयें राबता शिडकें दी मौजूदा स्थिति दा बी जायजा लैता। इस दौरान अफसरें बीआरओ दी टीम ते मकामी प्रशासन कन्नै बी गल्लबात कीती। डी.सी होरें बर्फ ढाहने दे कम्म दी रफ्तार उप्पर संदोख बुज्जेआ ते लोकें गी यकीन दोआया जे तौले गै शिडकें दे साफ होने मगरा गड्डियें दी आओजाई शुरू करी दिती जाग।

<><><><><><>

India-Export

अंतरराष्ट्रीय बजारें च बनी दी यक्कोतक्की आहली स्थिति दे बावजूद बी भारत दा माल-समेयान ते सेवा निर्यात 2024-25 अमरीकी डालर कोला पार रेआ। केंद्री बपार मंत्रालय मूजब औदे कोला पिछले माली बरे जात्तरी 2023-24 च एह आंकड़ा 778 अरब अमरीकी डालर हा ते एहदे च कोई सिद्धी 6 प्रतिशत दी बढोतरी दर्ज कीती गई ऐ। एह आंकड़े अज्ज नमीं दिल्ली निर्यात गी बढावा देने सरबंधी परिषद ते उद्योगिक संगठनें गी केंद्री बपार ते उद्योग मंत्री पीयूष गोयल होरें दित्ते। कार्यक्रम दा आयोजन उभरदी बपार परिस्थितिएं दी पछोक्कड़ै च चर्चा करने लेई कीता गेदा ऐ।

<><><><><><>

IPL

आई.पी.एल क्रिकेट च अज्ज बैंगलुरु च रायल चैलेंजर्स बैंगलुरु दा मकाबला दिल्ली कैपिटल्स कन्नै होग। बैंगलुरु दे एम. चिन्नास्वामी स्टेडियम च एह मैच शामी साड्डे 7 बजे शुरू होग। दिल्ली कैपिटल्स नै अजे तोहड़ी इस सीजन च इक बी मैच नेई हारे दा ते 6 लक लेइयै ओह अंक तालिका च त्रीए नम्बरै पर ऐ। तोआई, बैंगलुरु च'ऊं चा त्रै मैच जित्तियै चौथे नम्बरै पर ऐ।

<><><><><><>